

Kòkòbì Páũlũ ní sǐi sǐé 'bá
Ĕfésō
vé rǐ pi ní rǐ
Tã búkũ rǐ vé rǐ ã ũlũngará

Ĕfésō ri kǔrǔ ãmbúgu ãngũ ĩ ní zǐ Tákĩ rǐ ã jǐlé gá ũtǔ ní 'dengará gálé rú. Páũlũ adri caá ãngũ rǐ agá 'dǎlé ílǐ na, ri tǐ Múngu vé rǐ sǐé 'bá rǐ pi ní (Ĕzǐ 19). 'Bá kárakará ãngũ rǐ agá rǐ pi, 'bá kǔrǔ rǐ ã gǎrǎ rǐ pi be, ẽ'yǐkǐ Yésũ ri rá. Vǔdrǐ ni gé, Páũlũ kǎ rií adrií jó ãngũ ũ'yǐzú rǐ agá Rómã gá 'dǎá, sǐ kòkòbì 'dǐri sǐé 'bá kǎnísǎ vé Ĕfésō gá rǐ pi ní, lǔzú kòpi ní kǐnǐ, ẽsǐ kòpi ní 'bǎá Kúrísítō drǐgé 'dǐri, Múngu ũtǐ tã ni ní kǐnǐ, Úpí Kúrísítō ri adri ãmbúgu ngá vũ drǐgé nǒgó rǐ pi drǐgé, ãzini ngá 'bũ gé 'dǎá rǐ pi drǐgé.

Cápĩtã 1-3 agá, Páũlũ ũlũ 'bá Múngu ní ũpǐé gǐ rǐ pi vé tã, ãzini ũlũ tã Múngu ní kòpi pazú ìvé ũnjǐkǎnyǎ agásǐ, ĩri ní kòpi úmúzá ícázú Kúrísítō be ngá ãlu ĩrivé drǎngará sǐ rǐ vé tã, ãzini ũlũ ĩrivé íngángará ídri rú drǎngará gálésǐ rǐ vé tã. Cápĩtã 4-6 agá, lũ 'bá rǐ pi ní lǐtǐ kòpi ní ĩ úmúzá ícázú ngá ãlu Kúrísítō rǔ' 'bá gá rǐ.

¹ Ma Páũlũ 'i, Múngu ĩpǐe ma adrií Kúrísítō Yésũ vé 'bá áyúáyũ ni rú.

Á sǐ kòkòbì 'dǐri sǐé 'bá adri' 'bá Ĕfésō gá ẽsǐ 'bǎ' 'bée Kúrísítō Yésũ vé ẽzǐ nga' 'bá rǐ pi ní.

² Ēsī múké, āzini tākiri íngápi 'bá Ētēpī Múngú vúgá, āzini Úpí Yēsū Kúrísítō vúgá rī ā adri ĩmi be.

Múngú sē 'bá ní tākiri Kúrísítō ā rú sī

³ Lē 'bâ íngúkí 'bávé Úpí Yēsū Kúrísítō Ētēpī Múngú ri, ĩri ní 'bá ní tākiri sēé adrizú Kúrísítō agá rī sī, Kúrísítō íjī 'bá ní tākiri rī 'bū gélésīla. ⁴ Drīdrī ni, Múngú ní drī 'bū pi gbizú vū be kuyé rī gé, ĩpē 'bâ adrií uletere 'bá ívé ni pi rú ũnjīkānyā ākó, Yēsū Kúrísítō ā rú sī. Múngú vé lēngará sī, ⁵ 'dụ 'bâ 'bāá anji ívé ni pi rú Yēsū Kúrísítō ā rú sī, tā ni íbí íngá ĩri ē ěsī agá. ⁶ Lē 'bâ íngúkí Múngú ri ěsī múké ĩri ní 'bāá 'bá ní āmbúgú tā ĩrivé Mvā ĩri ní lēélē rī ní 'oó 'bá ní rī sī.

⁷ Kúrísítō vé ārí dā 'bâ tā sī, 'bâ drī jezú, trūkí 'bâ āní 'bávé ũnjīkānyā agásī gí, Múngú vé ěsī múké rī ā tā sī. ⁸ Múngú ē ěsī ní adrií 'bá ní múké rī sī, sē 'bá ní úmī, āzini tā nīngará. ⁹ Múngú vé tā ándúru ĩri ní úcí kuú 'í ěsī agá rī, i'da nóni 'bá ní āmvé. Tā ni íbí íngá ěsī ni agá, i'da tā rī Kúrísítō ā rú 'bá gá. ¹⁰ Tā Múngú ní ũtīī rī, ĩri 'dīni, sâ ni kādō ícó, ĩri ímú ngá 'bū gé rī pi íkūnā ngá vū drīgē rī pi be céré vūrā ālu gé, Kúrísítō ri ímú adri kōpi drīgē nī.

¹¹ Múngú ũpē 'bâ adrií anji ívé ni pi rú Kúrísítō agá. Ũpē 'bâ ótú ínógósí í'dóngará gá 'dāá, tā rī pi ĩ nga, sū Múngú ní ũtīī rī tīni. ¹² Múngú 'o tā 'dīri 'dīni, 'bâ ěsī 'bā'bée Kúrísítō drīgē drīdrī rī pi, 'bâ íngúkí rí Múngú ri āní. ¹³ ĩmi ní Kúrísítō vé ú'dúkó múké áda rī yīí rá rī sī, ú'dúkó múké

ĩmi ní ẹ'yǐí gí 'dĩri pa ĩmi nĩ. Ĩmi ní Kúrísítō ri ẹ'yǐí gí rĩ sǐ, sē ĩmi ní Índrí Uletere ĩri ní tā ni ẹzị rĩ, lūzú kínĩ ĩmi 'bá Kúrísítō vé ni. ¹⁴ Tā Múngú ní Índrí Uletere rĩ sēzú 'bá ní rĩ, lū 'bá ní uletere 'yozú kǐnĩ, ngá Múngú ní ẹzị ívé 'bá rĩ pi ní, 'bá ní rií ùtēé rĩ, ĩri ímụ sē 'bá ní rá. Kúru Múngú ri ímụ 'bá ní drịwālā sē, 'bā kúru ĩri ĩnjĩ, āzini 'bā ĩri íngú.

Páũlũ zị Múngú ri

¹⁵ Á yị tā ĩmi ní Úpí Yēsũ ri ẹ'yǐzú rĩ rá, āzini ā yị tā ĩmi ní 'bá Múngú vé rĩ pi lēzú céré rĩ rá. ¹⁶ Ụ'dụ céré má kǎdō rií Múngú ri zị, ma ri ĩmivé tā lū Múngú ní, ma ri ǒwǒ'dífō sē ĩri ní ĩmi tā sǐ. ¹⁷ Ma ri Múngú 'bávé Úpí Yēsũ Kúrísítō vé Ẹtẹpị ĩ ní ĩnjĩ ĩnjĩ rĩ zị ĩmi ní, ā sē rí ĩmi ní Índrí tā nǐzú ni, ẹ i'da rí ĩmi ní tā Múngú vé rĩ, ĩmi nǐkí rí Múngú ri ānǐ múké múké. ¹⁸ Ma ri Múngú ri zị ĩmi ní, ā zị rí ĩmivé úmĩ, ĩmi 'bākí rí ẹsị tā áda ĩri ní ĩmi zizú rĩ nǐzú ānǐ, āzini ĩmi nǐkí rí dǐngará úmvúlésĩ ĩmi ní dǐzú 'bá Múngú vé rĩ pi be trụ ālu 'dāri ānǐ. ¹⁹ 'Bá lēkí ĩmi nǐkí Múngú vé ũkpō āmbúgú ĩri ní sēé 'bā ĩri ẹ'yǐ' 'bá gí nǒ'bée ní rĩ. ũkpō 'dĩri ĩri ní áyú ²⁰ Kúrísítō ri ingazú gōzú ídri rú drāngará gálésila rĩ, sē ĩri úrǐ ívé drị ẹndẹpị* gé 'bũ gé 'dāá. ²¹ Kúru Kúrísítō ri āmbúgú mǎlāyíkā rĩ pi drịgé, índrí ũnjĩ rĩ pi drịgé, 'bá tǎimbị sē 'bá rĩ pi drịgé, 'bá ũkpō be rĩ pi drịgé, āzini 'bá āngũ ru' 'bá rĩ pi drịgé, adri 'yẹnǎ béré āndrũ nǒ'bée drịgé kuyé,

* **1:20** 1:20 Drị ẹndẹpị rĩ: Drị ẹndẹpị vé ífífí, ĩri vūrā Múngú vé ĩ ní ĩnjĩ ĩnjĩ rĩ, āzini vūrā ũkpō sēzú rĩ.

ĩri adri āmbúgú cazú lókí ímúpi drīdrī 'dǐ rī gé.
²² Múngú 'bǎ ngá rī pi ārēvú céré ĩri ā pále gá,
 Múngú ĩpē ĩri adrii āmbúgú ngá rī pi drīgé céré
 'bá kǎnísā† vé rī pi ní. ²³ 'Bá Kǎnísā vé rī pi rú' 'bá
 Kúrísítō vé ni. Kúrísítō ri ězǐ nga kǎnísā ívé rī
 agá nǐ. ĩri ívé ũkpō sē 'bá kǎnísā vé rī pi ní nǐ.

2

Kúrísítō ri sē 'bâ idri ĩsú rá

¹ ĩmi ní ándúró Múngú vé tā gǎá sǐ, āzini ĩmi ní
 ríi ũnjǐkǎnyā 'oó rī sǐ, índrí agá, ĩmi āsámví rará
 rú Múngú be, ĩmi índrékí sǐ 'bá ũdrǎ' 'bá gí rī pi
 tǐnǐ. ² Lókí 'dǎri gé, ĩmi rikí tā ũnjǐ nyōókú nōri
 vé rī 'dujú ngaá, ĩmi rikí Sātánā adriipi āmbúgú
 índrí ũnjǐ rī pi drīgé rī vé tā 'dujú ngaá. Sātánā
 ālu ālu 'dǐri ri 'bá Múngú ri gǎ' 'bá sǐ rī pi ě mǐ
 ũ'bǎ 'de tā ũnjǐ agá nǐ. ³ Őtú 'bá rikí céré tā 'oó
 sǐ 'bá ũnjǐkǎnyā 'o' 'bá rī pi tǐnǐ, 'bá rikí tā rú' 'bá
 nōri ní lēé rī pi 'dujú ngaá, āzini tā 'bâ ěsǐ ní lēé
 rī 'dujú ngaá. Tā rú' 'bá nōri vé rī sǐ, Múngú ā
 'a ve 'bá ní ũnjǐ ũnjǐ, sǐ ĩri ā 'a ní veé 'bá ũrukō
 ũnjǐkǎnyā 'o' 'bá rī pi ní rī tǐnǐ. ⁴ 'Bo Múngú ní 'bâ
 lēé agaá rá rī sǐ, 'bâ ívé ěsǐ ĩdríkídri agaápi rá rī
 'bá ní rá. ⁵ 'Bá ní ũnjǐkǎnyā 'oó rī sǐ, 'bâ adrikí dō
 sǐ 'bá ũdrǎ' 'bá gí rī pi tǐnǐ drǎāāsǐyā, Kúrísítō sǐ,
 índrí agá, 'bá gōkí ícá ídri rú. ĩmi ndrekí drī ká,
 ĩrivé ěsǐ múké rī sǐ, pa ĩmi gí. ⁶ Múngú inga 'bâ
 gōó ídri rú Kúrísítō be trú, sē 'bá ní vǔrǎ mužú
 úrízú Kúrísítō Yēsú be trú ívé mǎlǔngǎ 'bǐ gé rī
 agá. ⁷ Múngú 'o tā 'dǐri 'dǐni lǔzú kinǐ, ĩrivé ěsǐ

† 1:22 1:22 Kǎnísā: Kǎnísā ri 'bá Yēsú Kúrísítō ri ě'yǐ' 'bá gí rī pi.

múké agaápi rá rĩ sī, ĩri ímú 'bá ní tã múké sē, 'bá ní Kúrísítō Yēsũ ri ẹ'yǐí gí rĩ sī. ⁸ Múngú pa ĩmi ẹsị múké ívé rĩ sī, ĩmi ní Yēsũ ri ẹ'yǐí gí rĩ sī. Tã ni íbí íngá ĩmi vúgá kuyé, Múngú sē ĩmi ní fēfē rú ẹsị múké ívé rĩ sī. ⁹ Múngú pa ĩmi ẹzị ĩmi ní ngaá rĩ sī kuyé, 'bá āzi ẽ íngú rí 'i pangará 'dĩri sī ku. ¹⁰ 'Bávé adringará Kúrísítō Yēsũ agá nōri, Múngú sē 'bá ícá nóni nĩ, Múngú sē 'bá ní ídrí ú'dí tã múké 'ozú, útú tã múké 'dĩri vé tã kú ínogósí, 'bá rikí ngaá mužú.

'Bâ ngá ãlu Kúrísítō agá

¹¹ ĩmi 'bá adri 'bá Yāhúđĩ rú ku rĩ pi, lē ĩmi ígákí tã Yāhúđĩ ĩ íngú 'bá ĩvé ágélé ẽ tị úlǐngará* ã tã sī, 'yo 'bá kǐnĩ ĩmi pǎgánō, úlǐkí ĩmí ágélé ẽ tị kuyé 'dāri. ¹² Lē ĩmi nǐkí ámá múké 'yozú kǐnĩ, lókí drĩdrĩ 'dāri gé, ĩmi rikí adrií Kúrísítō rú 'bá gá sī rará rú, gũkí ĩmi Múngú vé 'bá Īsērélē vé rĩ pi āsámvú gé sī āmvé, ĩmi nǐkí ũndĩ Múngú ní ruú 'bá Īsērélē vé rĩ pi be rĩ kuyé. ĩmi ní rizú adrízú vũ drĩgé nōgó rĩ gé, Múngú adri ĩmivé ni kuyé, āzini ĩmi 'bākí ẹsị drĩ ni gé kuyé. ¹³ Ándúrú ĩmi āsámvú Múngú be rará rú, 'bo nóni Kúrísítō vé drāngará úmú ĩmi ícá ngá ãlu Kúrísítō Yēsũ be gí, ĩmi ní ĩri ẹ'yǐí gí rĩ sī, ĩmi nóni Múngú be ĩnyinjǎǎ.

* **2:11** 2:11 Ágélé ẽ tị úlǐngará: Múngú lū Ābūrámā ní kǐnĩ, anji āgō Ābūrámā vé rĩ pi adrikí dō caá ú'dú ārō gí, lē ã úlǐkí kōpi ã ágélé ẽ tị rá, ã lū rí 'yozú kǐnĩ, kōpi anji Múngú vé ni. 'Bá rĩ ā'yī dō 'i ágélé ẽ tị sēé lǐj gí, ĩri tǎmbị Mósē vé rĩ 'dụ nga. 'Í lā 'dóngará 17:9-14; Ẹzị 15:1-5.

14 Kúrísítō ijī tākiri 'bâ āsámvú gé 'bá adri' 'bá Yāhúđī ku rī pi be, ícǐ 'bâ āsámvú ícǎ ngá ālu, sē ngūngárá ũnjí 'bá ní 'bâ acozú rī gō deđé rá. 15 Kúrísítō vé drāngárá ímú tǎimbǐ Yāhúđī rī pi vé ĩ ní 'bá adri' 'bée Yāhúđī rú ku rī pi gǔzú āmvé 'dǐri fụú drǎá rá. Tǎ ā pá ĩri ní ímú zú rī, ímú kōpi úmú ícǎ ngá ālu, ijī tākiri ícǎ kōpi āsámvú gé. 16 Kúrísítō vé drāngárá pẹtī alambaku† sǐgé rī, úmú Yāhúđī rī pi 'bá Yāhúđī ku rī pi be ícǎ ngá ālu, sē kōpivé āsámvú Múngú be rī gō ícǎ múké, sē tǎ kōpi ní ĩ ngǔzú ũnjí rī gō deđé rá. 17 Kúrísítō ímú ỳ' dǔkó múké tākiri vé rī ũlǔú ĩmi 'bá adri' 'bée Yāhúđī rú ku Múngú ri nǐ' 'bá kuyé rī pi ní, āzini 'bâ Yāhúđī rú Múngú ri nǐ' 'bá rá rī pi ní. 18 Nóni 'bâ Yāhúđī rī pi, āzini 'bá adri' 'bá Yāhúđī rú ku rī pi ícǎ ca 'bá Ẹtẹpǐ Múngú vúgá 'dǎá ũkpō Índrí Uletere ālu ālu 'dǐri vé rī sǐ, āzini tǎ Kúrísítō ní 'oó 'bá ní rī sǐ.

19 Nóni ícókí ĩmi zǐj jǎkǎ ku, āzini ícókí 'yoó kǐnǐ, ĩmi adrikí āngǔ 'dǐpǎa kuyé 'dǐni ku, 'bo ĩmi nóni āngǔ 'dǐpǎa 'bá Múngú vé rī pi be trụ, āzini ĩmi nóni anji Múngú vé ni ĩrivé 'bẹtǐ āsámvú gé. 20 ĩmi adrikí sǐj jǎ ĩ ní sǐj rī tǐnǐ, nẹbǐ rī pi, Yẹsǔ vé 'bá áyúāyū rī pi be, kōpi írǎ anji ĩ ní ỳtǐj í' dǔzú jǎ sǐzú ānǐ rī tǐnǐ, Kúrísítō Yẹsǔ ri ívé rī írǎ sẹepi jǎ rī ní pá tuzú ānǐ ũkpó ũkpó rǐ. 21 'Bá Yẹsǔ ri ẹ'yǐ' 'bá gǐ rī pi úmúkí ĩ ícǎ ngá ālu Yẹsǔ be, kōpi gǔkǐ ícǎ Jǎ uletere Úpí vé ni. 22 ĩmi 'bá

† 2:16 2:16 Pẹtī alambaku: 'Bá Rómā vé rī pi ri 'bá tǎ 'o' 'bá ũnjí rī pi gbǎ mǔsǔmǎrǐ sǐ pẹtī alambaku sǐgé, ĩri sǎ 'dụ āco kōpi íbǐ drǎ ndō, kōpi ĩzāngǎ nya ambamba drāngárá rī gé.

adri'ba Yāhūdī rú ku 'dī'bée, Kúrísitō úmú ĩmi ícá Yāhūdī rī pi be ngá ālu, ĩmi adrikí rí vūrā Índrī Múngú vé rī ní adrizú ni.

3

Páulū ũlū ú'dúkọ múké Múngú vé rī

¹ Ma Páulū 'i, 'bekí ma jó rizú āngū ũ'yízú rī agá, má ní ú'dúkọ múké Kúrísitō Yésū vé rī ũlūú ĩmi 'ba adri'ba Yāhūdī rú ku rī pi ní rī ā tā sī.

² Ádarú ĩmi yíkí rá, ẹsì múké Múngú vé rī sī, sē má ní ẹzì rizú ú'dúkọ múké rī ũlūzú ĩmi ní ānì. ³ Múngú i'da tā 'í ní ẗfìjì kuú mūdūmūdū rú rī má ní, sù má ní sī kọkọbì drīdrī rī agá ẹlìjá rī tìjì. ⁴ ĩmi kádō kọkọbì rī lāá, ĩmi nī áamá uletere 'yozú kínì, á nī tā Kúrísitō vé Múngú ní ẗfìjì kuú mūdūmūdū rú rī rá. ⁵ Múngú i'da tā 'í ní ũzùú kuú mūdūmūdū rú 'dīri 'ba ọtù drīdrī 'dā'bée ní kuyé, 'bo nóni i'da tā rī 'ba Yésū Kúrísitō vé áyúāyū uletere rī pi ní, āzini nẹbì rī pi ní Índrī Uletere rī vé ũkpō sī. ⁶ Tā ĩ ní ũzùú kuú mūdūmūdū rú rī, ĩri 'dini, 'ba adri'ba Yāhūdī rú ku rī pi ẹ'yìkí ú'dúkọ múké rī rá, kuru kọpi ímú ĩ úmú ícá ngá ālu Yésū be. Tā 'dīri sī, kọpi Yāhūdī rī pi be, kọpi céré tā múké Múngú ní lée sēé ívé 'ba rī pi ní rī ìsù rá. Kọpi drīlé múké Múngú ní ẹzìjì Kúrísitō Yésū ā rú sī 'dīri ìsù Yāhūdī rī pi be trù ālu.

⁷ Ẹsì múké Múngú vé rī sī, sē má ní fēfē rizú ú'dúkọ múké rī ũlūzú, āzini sē má ní ũkpō ẹzì rī ngazú nī. ⁸ 'Ba Múngú vé rī pi āsámvú gé,

mâ adri dō kōpivé ūdũ* drāāāsīyā, Múngú vé éšī múké rī sī, ĩpē ma ú'dúkó múké Kúrísítō vé tā be agaápi rá rī ūlūú 'bá adri'bá Yāhūdī rú ku rī pi ní. ⁹ Múngú ngá rī pi ārēvú gbiípi céré rī ĩpē ma nī, mâ ūlū rí tā 'í ní ótú ũtī mūdūmūdū rú rī. ¹⁰ Múngú lē ívé úmī tā 'ozú rī lūú mālāyíkā 'bū gé 'dāá rī pi ní, āzini índrī ũnjí rī pi ní. Kōpi ímú tā 'dīri ndre lókí Yāhūdī rī pi ní ĩ úmúzú 'bá Yāhūdī ku rī pi be trū ívé kánísā agá rī gé. ¹¹ Múngú ũtī tā 'dīri ótú ínógósí, tā 'dīri nga 'i fūú tī ni gé gí, Kúrísítō Yēsū 'bávé Úpí 'du tā ni ngaá nī. ¹² 'Bá ní adrií Yēsū Kúrísítō agá, āzini 'bá ní ĩri ẹ'yī gí rī sī, ĩri 'bá ní drīwālā sē, 'bā fi muzú Múngú ẹndrēti gé 'dālé ũrī ākó. ¹³ Á mā ĩmi drī ĩrī sī, ĩzāngā má ní nyaá ĩmi tā sī rī sī, lē ĩmī éšī ā adri ĩzāngā sī ku, ĩzāngā má ní nyaá 'dīri sē Múngú ri ĩmi íngú āní.

Páulū zī Múngú ri 'bá Ēfēsō vé rī pi ní

¹⁴ Má kādō rií tā Múngú ní 'oó 'dī'bée ũsūú, ma ri kūmūcí ũtī, ma ri 'bá Ẹtēpi ri zī. ¹⁵ Ma ri Múngú ri zī, Múngú ri Ẹtēpi 'bá céré pi vé ni, 'bá 'bū gé rī pi vé ni, āzini 'bá vū drīgé rī pi vé ni. ¹⁶ Ma ri Múngú 'bá Ẹtēpi dīpi pōwūpōwū rī zī, ĩrivé Índrī ā sē rí ĩmi ní ũkpō ĩmivé éšī agá, ¹⁷ āní Kúrísítō ẹ ísú rí vūrā fizú adrizú ĩmī éšī agá, ĩmi ní ĩri ẹ'yī gí rī sī. Ma ri Múngú ri zī ĩmi ní, ĩmi lēkí rí Kúrísítō ri éšī be céré, ā sē rí ĩmi tukí rí pá ũkpó ũkpó. ¹⁸ Lē ĩmi ísúkí úmī tā

* **3:8** 3:8 Mâ adri dō kōpivé ūdũ: Páulū átá tā 'dīri 'dīni, ā'diātāsīyā ọcū 'bá Yēsū ā pámvú ũb' 'bá rī pi. 'Í lā búkū Ẹzī vé rī. Ẹzī 8:1-3.

nǎzú ámázú, sǔ 'bá Múngú vé rǐ pi ní ǐsú rǐ tǐnǐ, ĩmi nǐkǐ rǐ lēngárá Kúrísítō ní ĩmi lēzú ambamba 'dǐri áamá ānǐ. ¹⁹ Á lē ĩmi nǐkǐ tā Kúrísítō ní ĩmi lēzú ambamba 'dǐri, lēngárá 'dǐri ícókǐ ũ'bǐǐ bā ku. ĩmi nǐkǐ dō lēngárá 'dǐri rá, ĩmi adri tā be pǐrǐ, sǔ Múngú vé rǐ tǐnǐ.

²⁰ Lē ē íngúkǐ Múngú ũkpō be riǐpi ězǐ ngaápi 'bā rǔ'bá gá rǐ, ĩri ícó tā ārēvú 'o aga, tā 'bá ní zǐǐ, āzini 'bá ní riǐ ũsǔǔ rǐ pi drǐgē sǐ céré. ²¹ Lē 'bá kǎnísā vé rǐ pi ē íngúkǐ Múngú ri, ē íngúkǐ Kúrísítō Yēsǔ ri, āzini úyú drǐdrǐ 'dǐlé rǐ pi ē íngúkǐ Múngú ri mužú 'dǎni'dǎni! Āmīnā.

4

Adringárá trǔ Kúrísítō agá rǐ

¹ 'Yǐkǐ ma jó āngǔ ũ'yǐzú rǐ agá, má ní ězǐ Úpǐ vé rǐ ngaá rǐ sǐ, á mā ĩmi drǐ ĩrǐ sǐ, lē ĩmi 'okǐ tā múké ni pi mužú áyu, ā'diātāsǐyā Múngú zǐ ĩmi adriǐ 'bá ívé ni pi rú. ² Lē ĩmi íngúkǐ ĩmi ku, ĩmi adrikǐ tā be mǎdā. ĩmi 'dǔkǐ tā rǐ mužú ésǐ be mǎdā, ĩmi 'dǔkǐ tā rǐ ngaá ĩmi āsámví gé sǐ lēngárá sǐ. ³ Lē Índrǐ Uletere rǐ ā úmú ĩmi adriǐ ngá ālu, ĩmi adrikǐ tā be kǐri ĩmi āsámví gé sǐ. ⁴ ĩmi úmúkǐ ĩmi céré ícá rǔ'bá ālu gǐ, Índrǐ ĩmi ní ǐsú rǐ, ĩri ālu ālu 'dǐri, Múngú zǐ ĩmi céré, ĩmi 'bǎkǐ rǐ ésǐ tā drǐdrǐ 'dǐlé rǐ ũtēzú. ⁵ Úpǐ ri 'yēná ālu, ě'yǐngárá ri ālu, bātízǐmǔ ri ālu, ⁶ Múngú ri 'yēná ālu, ĩri Ētépǐ 'bá rǐ pi vé ni céré, ĩri āmbúgú 'bá drǐgē céré, ĩri ri 'bā áyú céré ri ězǐ nga, ĩri ri adri 'bá agásǐ céré.

7 'Bo Kúrísítō sē 'bá ālu ālu ní fēfē ívé ẹ̀sì múké vé rī ẹ̀zì ngazú ānì 'í ní. 8 Tā ĩ ní sī́ Búkū Múngú vé rī agá rī kīnī,

“Kā tųú muzú ụrụgégé 'dāá,
jì ívé ari'ba rī pi muzú ĩndī,
í'dú ngá kárákará awaá ívé 'bá rī pi ní.”

9 Tā ĩ ní 'yoó kínī, tų muzú ụrụgégé 'dīri vé ífífi ā'di? Īri lū 'yozú kínī, drīdrī ni, Kúrísítō ímú adrii vū drīgé nōgó, vūdrī ni gé, ĩri ní kúru tųzú muzú 'bū gé 'dāá. 10 'Bá ímụpi vū drīgé nōgó rī, ĩri 'bá ālu ālu ngaápi mụpị ụrụgégé 'bū gé 'dāá rī 'i, ĩri ímú adri āmbúgú ngá rī pi drīgé céré.

11 Kúrísítō ūpē 'bá rī pi ā ụrụkọ adrii 'bá áyúāyū ni pi, ụrụkọ'bée nēbī, ụrụkọ'bée 'bá Kúrísítō vé tā ūlū 'bá 'bá Kúrísítō ri ẹ̀'yī 'bá kuyé rī pi ní ni pi, ụrụkọ'bée vé ẹ̀zì adrizú atala* rú, ụrụkọ'bée 'bá āngū ímbá'bá ni pi. 12 'Bá 'dī'bée vé ẹ̀zì, kọpi ri 'bá Múngú vé rī pi ímbá, kọpi ā ngakí rí ẹ̀zì Kúrísítō ní, kọpi ā adrikí rí ūkpó ūkpó ívé ẹ̀'yīngará agá, kọpi ā úmúkí rí ĩ adrii rú 'bá ālu Kúrísítō vé ni, 13 cīmgbá 'bá ní 'bá úmúzú ícázú ngá ālu, 'bá ní Múngú Mvọpị ri ẹ̀'yīzú, āzini 'bá ní ĩrivé úmī 'dųzú tā ngazú, 'bá adrikí rí ūkpó ūkpó 'bávé ẹ̀'yīngará agá, tā céré sī, 'bá adrikí rí sū Kúrísítō tịni.

14 Lē 'bá rikí tā 'oó sū anjina nyirina rī pi tịni ku. Lē 'bá āngū ímbá'bá ūnjō sī rī pi vé ímbángará ā ri ĩmī úmī újā sū ūlī ní rii kúlúmgbá úvị yī drīgé sī ngālā ngālā rī tịni ku.

4:8 4:8 Sāwúmā 68:18 * 4:11 4:11 Atala rī pi: Atala 'dī'bée zākí rọbọjọ ku. Kọpi ri 'bá kánisā vé rī pi ímbá.

15 Ngá múké rĩ, lē 'bâ lēkí 'bâ lēlē, 'bâ átákí tã áda 'bâ āsámvú gé sĩ áyu, 'bávé ẹ'yĩngará ã mba rí ícá ũkpó ũkpó Kúrísítō adriipi kánísā drĩgé rĩ agá. 16 Kúrísítō úmú 'bâ céré 'í rụ'ba gá, sũ ĩgélé āndiāndí rĩ pi ní ĩ úmú adrii rụ'ba ālu gé rĩ tĩni. ĩgélé āndiāndí 'dĩ'bée ngakí dō céré ẹzi mužú múké, kōpi ĩ lēlē, ĩri sē rụ'ba rĩ mba ícá ũkpó ũkpó.

Ĕsị újángará

17 Úpí ã rụ sĩ, á lē 'yo ĩmi ní 'dini, lē ĩmi riki adrii sũ págánō tã nĩ'ba ku rĩ pi tĩni ku. 18 Ožũkí kōpivé úmĩ tã nĩzú rĩ gí, kōpi gũkí ĩ rará rú idri Múngú ní sēé rĩ agásĩ, ã'diātāsīyā kōpi gākí Múngú vé tã sĩ, kōpi ẹ drĩ ũkpó ũkpó. 19 Tã rĩ dō múké yā, dō ũnjí yā, kōpi ũsũkí ku. Kōpi lēkí tã drĩnjá sēepi ni 'oó mužú áyu, āzini kōpi ri tã āzāvũ rú ni pi ẹnđi 'o mužú dđi dđi.

20 'Bo tã Kúrísítō vé ĩ ní ímbá ĩmi ní rĩ adri 'dini kuyé. 21 Ádarú ĩmi yĩkí Yēsũ vé tã rá, āzini ímbákí ĩmi ní tã áda Yēsũ vé rĩ rá. 22 Ímbákí ĩmi kínĩ, lē ĩmi kukí létĩ ũkụ ándúró ĩmi úbepi fiipi ũnjĩkányā 'ozú 'dāri āní, lē ĩmi kukí tã ándúró ĩmĩ mị ũ'bāápi, ĩmi iza'bée izaza rĩ pi āní. 23 Ímbákí ĩmi kínĩ, lē ĩmivé yĩkí tã 'ozú rĩ ã újá 'i ícá ú'dí. 24 Lē ĩmi újákí ĩmivé adringará ícá ú'dí sũ Múngú ní ĩmi gbií sũ 'í tĩni rĩ tĩni, ádarú ĩmi adri tã be pĩri, āzini uletere.

25 Kúru lē 'bá ālu ālu ã ku ũnjō āní, lē ã átá tã áda rĩ áyu 'í ọgũpĩi Yēsũ ri ẹ'yĩ'ba gí rĩ pi ní, ã'diātāsīyā 'bá úmúkí 'bâ céré adrii rụ'ba ālu Kúrísítō vé ni gí. 26 "Īmĩ 'a ve dō gí, ã sē ĩmi

fií ũnjĩkānyā 'oó ku." Īmî 'a ve dō gí, lē ĩmi kukí 'a vengará 'dĩri ā ca ũtú ní 'dengará gá ku. ²⁷ 'A vengará ri sē ādróko† ri vūrā ĩsú úrízú ĩmî ẹsị agá. ²⁸ 'Bá āzi dō ĩmi āsámwú gé 'dĩgé ũgú rú, lē ā ku ũgū ā vúgú āní. Lē ā nga ẹzị 'î drị sī, ẹ ĩsú rí ngá, ā ko rí 'bá ngá ākó rī pi ẹ ĩzā āní.

²⁹ Lē átángá ũnjí ẹ ĩfū ĩmi tị gé sī ku, 'bo lē ĩmi átákí tā múké 'bá rī pi ẹ ĩzā koópi ní áyu, ā ko rí 'bá tā rī yì 'bá rī pi ẹ ĩzā. ³⁰ Lē ĩmi sēkí Múngú vé Índrì Uleterē rī ní ĩzāngā ku, Múngú sē ĩmi ní Índrì Uleterē rī, ā nĩkí rí ĩmi áamá āní kínĩ, ĩmi 'bá ívé ní, cazú ú'dú 'í ní úmvúlésĩ ĩmi ọyuzú ũnjĩkānyā agásĩ rī gé. ³¹ Ẹsị ũká ũká rī, ú'dúkọ āsīrā rú rī, jĩkó rī, āwāngará āsámwú gé sī rī, u'dangará rī, āzini tā ārēvú céré ríí 'olé ũnjí ũnjí rī pi, lē ĩmi kukí āní. ³² Lē ĩmi adrikí múké ĩmi āsámwú gé sī, ĩmi lēkí ĩmi lēlē, ĩmi trūkí ĩmi ọgūpị ĩmi 'o'bá ũnjí rī pi, sū Múngú ní ĩmi trūú Kúrísítō vé tā sī rī tịni.

5

Lē ĩmi adrikí sū Múngú ní lēé rī tịni

¹ Lē ĩmi 'okí tā pịri sū Múngú ní 'oó rī tịni, ā'diātāsīyā ĩmi anjì Múngú vé ĩri ní lēlē ní pi. ² Lē ĩmi lēkí ĩmi lēlē, sū Kúrísítō ní 'bā lēé rī tịni, adi 'i sēé drāá rọbọṅọ rú 'bā tā sī, sē Múngú adri āní āyĩkō sī.

4:26 4:26 Sāwúmā 4:4 † **4:27** 4:27 Ādróko: Ādróko vé rú Sātáná 'i, ĩri āmbúgú índrì ũnjí rī pi drịgé, gā tā Múngú vé ri 'dugá ngagá sī 'bū gé 'dálé. Múngú ídró ādróko ri índrì ũnjí rī pi be 'bū gé 'dāásĩ nĩ. 'Í lā I'dangará 12:7-9.

3 Īmi anji Múngú vé ni, lē ĩmi 'bākí ōwũ āluṅáni ku, ĩmi 'okí tã āzãvũ rú ni ku, ĩmi 'bākí ẹsì ǎmbúgú ngá drìgẹ ku, ǎ'diātāsīyā anji Múngú vé uletere rī pi 'okí tã ũnjí 'dī'bée ku. 4 Lē ĩmi rikí átángá ũnjí ũnjí ni pi átá ĩmi ǎsámvú gé sī ku, dōku ĩmi rikí tã azakaza vé ni pi átá ku, dōku ĩmi rikí átángá ríi átá áví agá ũnjíkãnyā íjipi ni pi átá ku. Tã 'dī'bée adri múké ku. Ngá múké rī, lē ĩmi rikí ōwō'dīfô sēé Múngú ní. 5 Īmi nīkí rá, 'bá ríipi ōwũ 'bǎápi muṅpi bǎdǎrú, ǎzini ríipi tã ũnjí 'oópi, ẹsì 'bǎápi ǎmbúgú ngá drìgẹ rī, 'bá 'dīri ri ngá ĩ ní údé múngú rú ni ĩnjī, ícó fíi mǎlũngǎ Kúrísítō pi vé Múngú be rī agá ku. 'Bá ẹsì 'bǎápi ngá drìgẹ ǎmbúgú rī, ĩri ri ngá vũ drìgẹ nōgó rī ĩnjī múngú rú.

6 Lē 'bá ǎzi ǎ ri átángá azakaza vé ni átá ĩmí mī ũ'bǎzú ku, ǎ'diātāsīyā tã 'dīni 'dī'bée sē Múngú ri 'bá tã 'o'bá drī ũkpó sī 'dī'bée ĩrĩṅǎ rá. 7 Lē ĩmi fikí tã 'bá 'dī'bée ní ríi 'oó rī 'oó ĩndī ku.

8 Ándúrú ĩmi rikí adrii ĩnĩná agá, 'bo nóni ĩmi ũtúná agá, ǎ'diātāsīyā ĩmi úmúkí ĩmi ícá Úpí Yẹsũ Kúrísítō be trú ngá ǎlu gí. Kúru lē ĩmi adrikí sũ 'bá adri'bá ũtúná agá rī pi tĩni. 9 'Bá adri'bée ũtúná agá rī pi, kòpi ri tã múké 'o, tã pĩri 'o, ǎzini tã áda 'o.

10 Lē ĩmi nīkí tã Úpí ní ǎyĩkō sēepi rī. 11 Lē ĩmi fikí tã ẹzì ǎkó ĩ ní ríi 'oó ĩnĩná agá rī pi 'oó ku, lē ĩmi i'dakí tã 'dī'bée ǎmvé kínĩ, tã 'dī'bée ũnjí. 12 Tã ũnjí 'bá Múngú ri nĩ'bá kuyé rī pi ní ríi 'oó kírí kírí 'dī'bée, ǎ rikí tã ni 'bǎá tị gé ku, ĩri drĩnjá sē. 13 'Bo ũtúná agá, tã ũnjí rī pi céré

índré ku uletere, ¹⁴ ā'diātāsīyā ūtúná ri sē ī ngá rī pi ārēvú ndre céré uletere. Ī ní 'yozú āní kínī, “Mi riipi ū'dú koópi rī, lē mī íngá ūru, mī 'bá drāápi gí rī, lē mī ídrí gōó ídri rú ūzi, Kúrísítō ri ímú dī mi drīgé ūtúná rú.”

¹⁵ Īmi kādō rií adrií, lē ĩmi adrikí mī be kowu, lē ĩmi ā adrikí sū 'bá tā nī'bá ku rī pi tīnī ku, lē ĩmi adrikí úmī be. ¹⁶ Īmi ísúkí dō drīlé múké tā 'ozú ni gí, lē ĩmi 'okí tā múké ni pi mužú áyu, ā'diātāsīyā lókí nōri, ĩri lókí ūnjí. ¹⁷ Lē ĩmi adrikí azakaza rú ku, lē ĩmi nīkí tā Úpí ní lēé ĩmi 'okí rī. ¹⁸ Ā mvukí íwá ĩmērēzú bādāru ku, ē iza rí ĩmivé adringará ku, ngá múké rī, lē Índrí Uletere rī ā ású ĩmi nī. ¹⁹ Īmi kádō ĩmi úmú vūrā ālu gé, lē ĩmi ngokí úngó Sāwúmā vé rī pi, ĩmi ngokí úngó Múngú ā rú sī. Lē ĩmi ngokí úngó Úpí Múngú ri ĩnjīzú éšī be céré. ²⁰ Ū'dú céré, lē ĩmi sēkí ōwō'dífō 'bá Ētēpi Múngú ní tā céré ĩri ní 'oó ĩmi ní rī sī, 'bávé Úpí Yēsū Kúrísítō ā rú sī.

Ūkú rī pi ĩvé āgō rī pi be

²¹ Lē ĩmi adrikí yīngará sī ĩmi āsámvú gé sī, ā'diātāsīyā ĩmi 'dīri ri Kúrísítō ri ĩnjī. ²² Lē ūkú rī pi ā yīkí ĩvé āgō rī pi ē tī yīyī, sū kōpi ní Úpí ē tī yīyī rī tīnī. ²³ Ā'diātāsīyā ágó ri āmbúgú ūkú drīlé gá nī, sū Kúrísítō ní adrií āmbúgú kánísā drīlé gá rī tīnī, Kúrísítō ri 'bá rī pi pa ĩvé ūnjīkānyā agásī nī. ²⁴ Kúru lē ūkú rī pi ā yīkí ĩvé āgō rī pi ē tī yīyī tā céré sī, sū kánísā ní Kúrísítō ē tī yīyī rī tīnī.

²⁵ Lē āgō rī pi ã lēkí ìvé ũkú rī pi lēlē, sū Kúrísítō ní 'bá kánísā vé rī pi lēé, ìrì ní 'i adii sēé dráá kòpi ã tā sī rī tìni, ²⁶ 'bá kánísā vé rī pi ã adrikí rí uletere, ã ũjī rí 'bá kánísā vé rī pi adrií ũnjīkányā ākó, ú'dúkọ múké rī ã ũjī rí 'bá kánísā vé rī pi ícá uletere. ²⁷ Kúrísítō vé drāngará sī, 'du 'bá kánísā vé rī pi 'bāā 'bá ívé ni, adi 'i sēé dráá, 'bá kánísā vé rī pi ã adrikí rí uletere, tā ākó, āzāvū ākó, ũnjīkányā ākó, tā āzi ākó. ²⁸ Kúru lē āgō rī pi ã lēkí ìvé ũkú rī pi lēlē, sū kòpi ní ì rú' 'bá lēé rī tìni. 'Bá rī lē dō ívé ũkú lēlē, 'bá 'dīri lē 'i rú' 'bá lēlē. ²⁹ 'Bá āzi āluṅáni 'i rú' 'bá gāápi sī ni 'dāáyo, ìri sù 'i rú' 'bá gá sùsù, ìri ì rú' 'bá ùtētē, sū Kúrísítō ní 'bá kánísā vé rī pi ùtēé rī tìni. ³⁰ 'Bá 'bá Kúrísítō vé ni, 'bā ìrivé rú' 'bá ìgélé.

³¹ Sīkí Búkū Múngú vé rī agá kìní, "Tā 'dīri sī, 'bá ágó rí ívé étèpì ku, ìri ívé èndrèpì ku, kòpi ì úmú ũkú ni be, 'bá ìrī 'dī' 'bée ì úmú adri rú' 'bá ālu." ³² Átángá 'dīri mbamba, ícọ fí 'bá āzi drīgé múké ku, 'bo á lē tā 'dīri vé ífífí ũlúú uletere, átángá 'dīri lū kpá tā Kúrísítō pí vé 'bá kánísā vé rī pi be rī. ³³ Kúru lē 'bá ālu ālu ã lē ívé ũkú sū 'i ní 'i rú' 'bá lēé rī tìni, āzini lē ũkú rī ē ìnjī ívé ágó ìnjīnjī.

6

Anjina rī pi vé tā 'bá ì tì' 'bá rī pi be rī

¹ Anjina rī pi, lē ìmi 'dúkí tā ìmi étèpì vé rī, āzini ìmi èndrèpì vé rī ngaंगा, ã'diātāsīyā ìmi 'okí dō 'dīni, ìri múké. ² "Lē mī ìnjī mí étèpì pi mí èndrèpì be ìnjīnjī," Tāímbí ālu rī 'dīni, Múngú

kīnī, 'bá rī 'du dō tā rī ngaá sū 'dīri tīnī, ĩri tā múké ísú rá. ³ “Mí ĩnjī dō mí étépī pi mí ẹndrẹpi be ĩnjīnjī, mí drīlé rī adri múké, mí adri ílí be āco vū drīgé nōgó.”

⁴ ĩmi anji étépī, lē ĩmi átákí átángá anjiná rī pi ní ụ'dúkọ ũkpó ũkpó ní sī ku, ĩmi ímbákí kọpi létī múké sī, ĩmi ũlŭkí tā Úpí vé rī kọpi ní.

Túgẹrī rī pi 'bá ambugu ĩ drīlé gá rī pi be

⁵ ĩmi túgẹrī rī pi, lē ĩmi yíkí 'bá ambugu ĩmi ní ríí ẹzị ngaá kọpi ní vū drīgé nōgó rī pi ẹ tị yiyi, āzini lē ĩmi rukí kọpi ruru. Lē ĩmi ngakí kọpi ní ẹzị rī ẹsị be céré, sū ĩmi ní ngaá Kúrísítō ní rī tīnī. ⁶ ĩmi ngakí ẹzị rī ũkpō sī, ā adri 'yozú kínī, 'bá ĩmi ní ríí ẹzị ngaá kọpi ní rī pi ní ríí mị 'bāá ĩmivé ẹzị ndrezú gōgō rī sī ku, ĩmi ngakí ẹzị rī, sū túgẹrī Kúrísítō vé ni pi tīnī, lē ĩmi ngakí ẹzị rī, sū Múngú ní lēé rī tīnī. ⁷ ĩmi ngakí ẹzị rī ẹsị be céré, sū ĩmi ní ríí ngaá Úpí ní rī tīnī, adri 'yozú kínī, sū ĩmi ní ríí ngaá 'bá áda ní rī tīnī ku, ⁸ ā'diātāsīyā ĩmi nīkí rá, 'bá rī dō túgẹrī yā, adri dō túgẹrī ku yā, ẹzị múké ĩri ní ngaá rī sī, Úpí rī ĩri ũfē rá.

⁹ ĩmi 'bá ambugu túgẹrī rī pi ní ríí ẹzị ngaá ĩmi pálé gá rī pi, lē ĩmi rukí ĩmivé túgẹrī rī pi múké létī ālu ālu 'dīri sī, ā 'okí kọpi ũnjí ku. Lē ĩmi ĩmgbēkí kọpi ẹ mị ku, lē ĩmi nīkí áamá múké 'yozú kínī, ĩmi céré rī ẹzị nga Múngú 'bávé āmbúgú 'bū gé 'dāá rī ní, ĩri ẹndrẹtī gé, 'bá rī pi céré trōtrō.

Ngá Múngú vé ẹ'dị 'dizú ādróko be rĩ.

¹⁰ Átángá rĩ ā ụdụ kīnī, lē ĩmi adrikí ũkpō ũkpó Úpí vé ũkpō agaápi rá rĩ sī. ¹¹ Lē ĩmi úsúkí ĩmi ngá Múngú vé ẹ'dị 'dizú rĩ pi sī, ĩmi ndēkí rí ādróko riipi mị ũ'bāápi rĩ ānī. ¹² Ẹ'dị 'bá ní rií 'dị rĩ, 'bá 'dikí 'bá áda pi be ku, 'bá ri ẹ'dị rĩ 'dị índrí ũnjí ũkpō be āngū ru' 'bá rĩ pi be, índrí ũkpō be adri' 'bá ínińá agá rĩ pi be, āzini índrí ũnjí ũkpō be ụrụ 'dāá rĩ pi be. ¹³ Kúru lē ĩmi úsúkí ngá Múngú vé ẹ'dị 'dizú rĩ pi ĩmí rụ' 'bá gá, ụ'dụ ādróko ní ímúzá ẹ'dị 'dizú ĩmi be rĩ gé, ĩmi tukí rí pá ũkpó ũkpó, ẹ'dị rĩ kādō deẹ, ĩmi áwíkí rí pá tuú kuú ũkpó ũkpó. ¹⁴ Lē ĩmi tukí pá ũkpó ũkpó, ĩmi ũ'yíkí gō tā áda vé rĩ ĩmi ụpílẹ gá títí, ĩmi útúkí rí ĩmi kú ũrē ẹ'dị 'dizú ādróko be, āzini ĩmi ũ'yíkí aya kpọọ' 'bụ tā pịrị vé rĩ ĩmi bēdrī gé, ĩmi ütēkí rí ĩmí rụ' 'bá ānī. ¹⁵ ĩmi adrikí ũrē muú ụ'dúkọ múké tākiri vé rĩ ũlūú, sū ĩmi ní ngá pá gá úsú muzá ānī ẹ'dị 'dizú rĩ tịni. ¹⁶ ĩmi ẹ'yíkí Múngú ri, ā adri rí ĩmi ní sū kúkúrukú tịni, ā úgbú rí í'yé ādróko vé ácí ácí rĩ ĩmí rụ' 'bá gá sī rá. ¹⁷ Lē ĩmi rúkí pangará rĩ vé tā títí, sū ĩmi ní sāpú aya rú rĩ úsú ĩmi drígé rĩ tịni, āzini lē ĩmi rúkí ílị āco Índrí Uleteré vé rĩ ĩmi drígé, ílị āco 'dīri, ĩri ụ'dúkọ Múngú vé rĩ.

¹⁸ Lē ĩmi zíkí Múngú ri sâ be céré ũkpō Índrí Uleteré rĩ vé rĩ sī, lē ĩmi adrikí mị be kowu, āzini lē ĩmi zíkí 'bá Múngú vé rĩ pi ní céré lẹti be āndiāndí muzá ụdụ ākó. ¹⁹ ĩmi zíkí kpá má ní Múngú ri ĩndī, Múngú ā sē rí átángá pịrị má tị gé, mâ ũlū rí ụ'dúkọ múké Múngú vé rĩ 'bá rĩ

pi ní ũrĩ ãkó, kôpi ã nĩkí rí ĩrivé tã múké. ²⁰ Ā 'beki dô ma jó ângũ ũ'yĩzú rĩ agá má ní ú'dúkó múké rĩ ũlũú rĩ ã tã sī drããasīyã, lē ĩmi zíkí má ní Múngú ri, mâ ũlũ rí ú'dúkó múké rĩ mužú drĩdrĩ ũrĩ ãkó, sũ má ní lēé rĩ tĩnĩ.

Páũlũ vé mōdó sēlé ũdũ gé rĩ

²¹ Má édrĩpĩ Tũkíkō má ní lēélē, ězĩ ngaápi ẹsĩ ãlu sī Úpí ní rĩ, ĩri mávé tã ũlũ ĩmi ní nĩ, ĩmi nĩkí rí mávé adringára, ãzini ězĩ má ní riĩ ngaá rĩ. ²² Tã ã pá má ní lēzú ĩri pēzú mužú ĩmi vúgá 'dĩlé rĩ, ĩri 'dĩ, ĩmi nĩkí rí tã 'bá drĩgé bēnĩ, ã mužú rí ĩmĩ ẹsĩ ímbá, ĩmi adrikí rí ũkpó ũkpó.

²³ Má édrĩpĩi má ọmvúpĩi, 'bá Ẹtépĩ Múngú, ãzini Úpí Yēsũ Kúrísítō ã sē ĩmi ní tākiri, lēngára, ãzini ẹ'yĩngára. ²⁴ Ẹsĩ múké Múngú vé rĩ ã adri 'bá céré 'bávé Úpí Yēsũ Kúrísítō ri lē'bá mužú ũdũ ãkó rĩ pi ẹ ẹsĩ agá.

Ū'dúkó Múké Múngú vé rị

Keliko: Ū'dúkó Múké Múngú vé rị New Testament+
copyright © 2017 Wycliffe Bible Translators, Inc.

Language: (Keliko)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

14717198-957a-524c-b31f-2c3197945b20